

■ PER LA DUMENGIA

Il Pascha dals Gedijs

DA CARDINAL CARLO MARIA MARTINI

L'autur dal text suandant è l'arzuestg da Milaun cardinal Carlo Maria Martini. Quel ha edì avant in onn in cu-desch cul titel «Dizionario Spirituale – Piccola guida per l'anima». Da quest dicziunari spiritual e pitschen guid per l'olma avain nus translata in text per la dumengia. La redacziun.

Tge impurtanza ha il Pascha respectiv il Pessach dals Gedijs? Igl è in past a chaschun d'ina festa da famiglia: Insatge fitg simpel che sa distanziescha da la petradad e da la grevezza da la lavur.

Il Pascha è in past en la famiglia tar il qual ins mangia sco als dis da festa. Tut vegn preparà cun premura. Igl è in mument en il qual ins emblida tuts quitads. I sa tracta d'in past festiv tar il qual igl è d'observar e da preparar las ceremonias sco insatge sontg. Tut quai ha dentant lieu el ravugl famigliar, en gronda intimitad e simpladad.

Tge impurtanza ha ussa questa festa per ils Gedijs da tut il temp? I vul dir da deponer ils quitads e las temas da la vita e da passentar in mument da liberaziun ideala e reala, ins è in mument

libers da tut quai che renda la vita schi greva.

En la festa dal Pessach sa manifestescha e daventa surtut alerta la memorgia a la persecuziun ed a las difficultads. Quels èn preschents, na smatgan dentant betg sin l'olma. En il mument dal Pessach vivan ins en ina situaziun sco sch'ina pausa fiss entrada en la istorgia.

Cura che Israel aveva festegià l'emprima giada il Pessach n'era el anc betg parti da l'Egipta. El era anc sut la smanatscha da la sclavaria, e tuttina viveva el gia in mument da liberaziun. Pessach lascha da la vart ils quitads, malgrà l'ostilitad dal conturn. Ins festegia la victoria cunter la tema da la vita, en la speranza e confidenza che Dieu è il liberatur.

Il Pessach è ina festa religiosa en la quala i vegn festegià – en circumstanzas difficultusas – la pussanza victoriosa da Dieu. E da questa maniera vivan ins gia realmain la liberaziun, pertge en la festività è ella gia preschenta.

Sch'ils uffants dad Israel festegian il Pascha sa regordan els: Ussa ans liberescha Dieu, quai è il temp da noss salvament.